



HIMAGSIK

Rebolusyonaryong Pahayagan ng Gitnang Luzon

Taon XXVIII Blg. 8

REGULAR NA ISYU

Nobyembre-Disyembre 2002

Labanan ang tumitinding karahasan at militarisasyon!

Higit na nagiging desperado ang mga hakbangin ng rehimeng Macapagal-Arroyo sa pagsupil at pagpapatahimik sa lumalaganap na diskuntento ng mamamayan. Mas lalo itong tumutungo sa paraang lantay-militar sa pagresolba sa tumitinding kahirapan at sa kabilang banda'y sa lumalakas na pambansa demokratikong kilusan.

Kamakailan ay ipinuslit at patraydor na pinirmahan ng rehimen ang MLSA (Mutual Logistics & Support Agreement), ang kasunduang tuwirang magpapahintulot na gawing lunsaran ang bansa ng gerang agresyon ng Imperyalistang US sa Asya. Binibigyang katwiran din nito ang pananatili ng mga tropang Kano at mga posibilidad ng tuwirang panghihimasok ng mga ito sa nagaganap na gera sibil sa bansa. Takot na takot ang rehimen na idaan pa ito sa senado at kongreso at isalang sa mga pampublikong debate na ibayong maglalantad sa tunay na layunin at peligrong dala ng kasunduan.

Ang deklarasyong pag-atras ni Macapagal-Arroyo sa eleksiyong 2004 ay hindi nag-aabswelto sa kanyang pananagutan sa tumitinding pasismo at karahasan sa bansa. Bilang Punong Kumander ng Armed Forces of the Philippines (AFP), nasa kanyang pamumuno at kumand ang pagpapatupad ng todo-gerang kampanya laban sa mamamayan at rebolusyonaryong kilusan. Ito ang todo-largang panunupil at karahasang isinasagawa pangunahin ng AFP na walang kinikilalang batas at karapatang-tao. Magreresulta ito sa lalo pang malalalang kaso ng pananakot, pagpaslang at operasyong militar ng AFP, PNP, CAFGU at iba pang grupong para-militar laban sa kilusan at mamamayan.

Partikular sa rehiyon, may mga naging biktima ng pagdukot at pagpaslang ng mga berdugong militar sa mga kilalang lider-aktibista. Kabilang sa mga dinukot at hanggang ngayo'y di pa inililitaw ay sina

Honorio Ayroso, Johnny Orcino ng Nueva Ecija, Rowena Bayani at Edwin Villaruz ng Aurora. Nariyan din ang pagdukot, interogasyon at pananakot sa anak, magulang o kamag-anak ng mga kasama sa rebolusyonaryong kilusan.

Mas nagiging lantaran at pwersahan ang pagrerekluta ng mga CAFGU, Civilian Volunteers Organization at iba pang samahan na ginagamit sa pagmamanman sa mga aktibidad ng mga samahang magsasaka at iba pang progresibong asosasyon sa baryo. Pagkatapos ng isinasagawang operasyong militar sa lugar, sapilitan ang pagpapasapi sa CAFGU tulad ng karanasan ng mga taga-barangay Nabuklod, Florida Blanca, Pampanga habang ang ibang tumanging sumapi ay pinararatangang NPA o taga-suporta nito. Lalo ring pinag-iibayo ang paglalata ng lambat-paniktik sa hanay ng mga kabataan at estudyante, sa mga baryo at komunidad at sa iba pa habang mas madalas ang mga operasyong militar o "strike operations" sa mga lugar na may mga lehitimong pagkilos at pakikibaka ang mamamayan. Layunin ng mga operasyong militar na ito na takutin ang mamamayan at supilin ang kanilang mga demokratikong karapatan.

Ang mga operasyong militar at masinsing pagtatayo ng mga detatsment ay sinasabayan ng mga operasyong saywar, mga

Tampok Ngayon

Mga tagumpay laban sa militarisasyon

p. 2-3

Matatagumpay na minimum na RA at laban sa

importasyon ng bigas

p. 6-7

Hakbang pasulong sa rebolusyon

p.8

kunwaring aksyong medikal at sibil na pawang naglalayong linlangin ang mamamayan at lansagin ang mga ganansya ng mga pakikibakang magsasaka sa mga larangang gerilya. Nitong nakaraan, bigo ang pang-uupat ng mga elemento ng Philippine Army sa Pampanga na tambangan ang isang yunit ng BHB nang akalain nitong hahabulin sila ng mga kasama matapos silang magpanggap na mga bandidong RHB.

Ang desperasyon ng rehimen at ang pagpapatupad nito ng todo-gerang kampanya laban sa rebolusyonaryong kilusan ay mabilis na gumigising sa diwang palaban at makabayan ng mamamayan. Ang pamamaraan nito ng panunupil at karahasan ay kahalintulad ng sa nakaraang rehimen ng diktadurang Marcos. Sa gayo'y, tiyak na aanihin ng rehimeng Macapagal-Arroyo ang matinding poot ng mamamayan tulad ng sinapit ng diktador na si Marcos.

Nasa buong rebolusyonaryong kilusan ang suporta ng sambayanan at tulad sa nakaraan ay mabibigo ang mga kontra-rebolusyonaryong karahasan ng kasalukuyang rehimen. Napanday na sa mahabang panahon ng buhay at kamatayang pakikibaka ang mamamayan at ang buong rebolusyonaryong kilusan, ngayo'y higit na matatag itong haharap at lalaban sa ibat ibang mukha ng pasismo at karahasan.

Mulat at buong katatagang harapin ang tumitinding karahasan at militarisasyon sa kanayunan! Ilunsad ang mga taktikal na opensibang bibigo sa kontra-rebolusyonaryang gera ng rehimen! Labanan ang lahat ng porma ng panunupil, pananakot at panlililang sa mamamayan at mga ligal na organisasyon sa kalunsuran! *H*

Sa Hacienda Luisita: **Militar, nabigong magtayo ng detatsment**

Binigo ng sama-samang pagkilos ng mga taumbaryo ang balak na pagtatayo ng detatsment ng mga elemento ng 69th IB sa Brgy. Balite sa loob ng Hacienda Luisita sa Tarlac nitong nakaraang Oktubre.

Pasikreto sana ang balak ng mga militar na pagtatayo ng detatsment subalit nang matunugan ito ng taumbaryo, agad silang nagtipon upang kumprontahin ang mga sundalo kaya't naobligang huli na kagyat maglunsad ng dayalogo. Karamihan sa mga dumalo sa dayalogo ay mga kababaihang di nakayang takutin ng mga militar.

Ikinatwiran ng mga militar na pinamumunuan ng isang Tinyente Aquino na magtatayo sila ng detatsment para pangalagaan ang kapayapaan ng baryo. Subalit tinugon sila ng taumbaryo na "may mga opisyal ang aming baryo na gagampan niyan, hindi namin kayo kailangan!"

Kasunod niyon, sinabi ng mga sundalo na "magesensus na lang kami para maipaabot sa gubyerno ang inyong mga karaingan." Ang sagot naman ng mga tao: "Katatapos lang ng aming sensus. Kung kailangan ninyo, magesensus uli kami!"

"Kung ayaw ninyo, susundin na lang namin ang utos ng opisyal namin!", ang padabog na wika ni Tinyente Aquino. Subalit di na ito nakakibo nang

tanungin siya ng taumbaryo na "ang ibig nyo bang sabihin ay babalewalain ninyo ang mga halal naming opisyal nitong baryo?"

Pagkatapos ng dayalogo, ibinulong ni Tinyente Aquino sa isang opisyal ng baryo na "Dapat di nyo muna hinayaang pumunta rito ang mga tao, di ko tuloy masagot ang kanilang tanong."

Ang pagtatayo ng detatsment ng mga militar sa mga baryong sakop ng asyendang pag-aari ng mga Cojuangco ay inumpisahan sa kasagsagan ng paglaban ng mga manggagawang bukid para sa dagdag na araw ng trabaho, dagdag na sahod at mga benepisyo.

Balak ng mga Cojuangco na patayuan ng detatsment ng militar at Cagayang ang lahat ng sampung baryong saklaw ng asyenda upang takutin ang mga mamamayang lumalaban sa kanilang mga patakaran. Kaakibat nito, nanunuhol ang mga militar sa kapitan ng mga baryo ng pabuyang tatlung libong piso para sa pondo ng barangay at tigsampung libo naman para sa mga opisyal ng baryo kapalit ng pagpayag sa pagtatayo ng detatsment.

Sa kasalukuyan, ikinakampanya ng mga mamamayan sa magkakanugnog na baryo ang pag-aalis ng detatsment na nauna nang naitayo sa dalawang baryo. *H*

RSOT, pinalayas ng taumbaryo

“Hindi namin kayo kailangan dito!” Ito ang tugon ng mga taumbaryo ng Brgy Villa Marina sa mga militar na nagsagawa ng pagsesensus at pulong sa baryo.

Hunyo 2002, sabay-sabay na nag-*strike operation* ang limang platun ng *provisional battalion* mula sa 48th, 54th 71st Infantry Battalion ng Philippine Army sa San Jose City at mga bayan ng Guimba, Nampicuan, Talugtug, Cuyapo, Lupao at Pantabangan sa Nueva Ecija. Partikular sa San Jose City, nilagyan ng tig-siyam katao mula sa *provisional battalion* ang mga baryo ng Parilla, Porais, Palistina, Culaylay, Kita-kita, Villa Marina at Manicla.

Bago humimpil ang militar sa brgy Villa Marina ay kinausap sila ng konseho ng barangay. Pinagsabihan sila na “Kung dito kayo hihimpil sa aming baryo, huwag kayong iinom ng alak, huwag

kayong mag-ooperasyon nang hindi alam ng konseho, huwag kayong magsusugal at huwag kayong manliligaw!”.

Ito naman ang mariing ipinahayag ng mga taumbaryo sa isinagawang pulong ng RSOT, “Marami na kaming karanasan na nagkampo sa aming barangay ang mga tauhan ng PC, CHDF, Army, CAFGU na ang nangyayari ay gumugulo sa aming baryo dahil sa inuman, panliligaw sa may asawa, sugalan at nakawan. Ang kailangan at problema namin dito ay pambili ng abono at pestisidyo, bigas, lupang ituturing naming amin.”

Dahil hindi nasunod ng mga tauhan ng RSOT ang ibinabang patakaran ng konseho at ng mga taumbaryo, pinangunahan ng konseho ng barangay ng Villa Marina ang pagpapalayas sa nabanggit na mga tauhan ng militar. Kaya napilitang umalis sa baryo ang mga militar. *H*



Magnanakaw na militar, napresyur, humingi ng tawad sa taumbaryo

Dahil sa militante at organisadong pagkilos ng mga taumbaryo, napresyur nilang humingi ng tawad at nangakong magbayad ang mga magnanakaw na militar.

Hulyo 18 nang taong ito, nag-operasyon ang isang platun ng 71st IB PA sa utos ni Col. William Campos sa sityo Banbanaba, Brgy Maangol, San Jose City. Dito ay nagnakaw sila ng kaldero at karborandom. Pinasok din nila ang sityo Baker; nagnakaw sila dito ng kambing na kinatay nila sa malapit sa sityo. Matapos nito ay dumiretso sila sa Baryo Maangol at nagnakaw uli sila ng manok at mga itlog.

Matapos ang nakawang nabanggit, nagkaisa ang mga taumbaryo na magpapirma ng petisyon at gumawa ng sulat-reklamo laban sa mga perwisyo at magnanakaw na militar. Nagpadala sila ng kopya nito kina Mayor Alex Villena, Congressman Eliuterio Violago, Bishop Leo Drona, Gob. Tomas Joson at Col. William Campos.

Napresyur ang militar na humingi ng paumanhin sa mga taumbaryo at bayaran ang kanilang mga ninakaw. Tatlong araw na

sunud-sunod na pumasok ang 71st IB PA sa Maangol at nagmakaawang patawarin sila. Babayaran daw nila lahat ang mga nawala. Sumang-ayon din ang militar sa kagustuhan ng taumbaryo na kapag may plano silang operasyong militar ay kailangang magpaalam muna sa Brgy Kapitan. *H*

Paglabag sa karapatang-tao at psy ops ng militar sa GL, nagpapatuloy

Patuloy ang paglabag sa karapatang-tao ng mamamayan at paglulunsad ng operasyong saywar ng mga tauhan ng militar sa Gitnang Luzon (GL). Ilan sa huling mga pangyayari dito ang mga sumusunod:

> *Pagdukot ng militar sa anak ng mag-asawang kasama.*

Dinukot ng mga tauhan ng Charlie Coy 71st Infantry Battalion ng Philippine Army (IB PA) sa Brgy Malinao, Gabaldon, Nueva Ecija ang apat na taong gulang na panganay na anak ng mag-asawang kasama noong Nobyembre 14 ng hapon. Ayon sa bata, tinanong sa kanya kung nasaan ang kanyang nanay. Tinakot siya ng isang CAFGU na susunugin kung hindi ituturo ang kanyang magulang. Hinabol at sinundan ng mga kamag-anak ang bata kayat nabawi nila ito.

> *Pagpapatupad ng curfew at iba pang mga anti-mamamayang ordinansa.*

Ipinasa ang *municipal ordinance* sa San Nicolas, Pangasinan kaugnay ng curfew mula 8:00 n.g. hanggang 5:00 n.u. Sinimulan itong ipatupad nitong Oktubre 17. Sa mga bayan ng San Nicolas at San Manuel, ipinagbabawal sa sinuman ang magkabit ng ilaw sa ulo. Ipinagbabawal din sa San Nicolas ang pagpunta ng mga estudyante ng UP kung walang pahintulot si Mayor Rodrigo. Mga rekruter daw ng NPA ang mga taga-UP.

Ipinatutupad na rin ang curfew sa ilang mga baryo ng Nueva Ecija at Bulacan. Sa Angeles City sa Pampanga, may curfew naman para sa mga kabataang mas bata sa 18 anyos.

Ang pagpapatupad ng curfew ay bahagi umano ng pagsugpo sa problema ng droga at banta ng “terorismo”. Sa nabanggit na mga ordinansa, apektado ang kabuhayan at aktibidad ng mga mangingilaw (nangunguryente ng isda at palaka), mga magsasaka, mga kabataan at buong taumbaryo/komunidad.

> *Sapilitang pagrerekrut ng militar ng mga tauhan ng CAFGU sa hanay ng mga taumbaryo.*

Halimbawa nito ay ang pagrerekrut ng CAFGU sa brgy Nabuklod ng Floridablanca, Pampanga kung saan ay nagtayo na ng destatment ang 69th IB PA. Tinatakot ng militar ang mga taumbaryo na kung hindi sila sasapi sa CAFGU ay kakasuhan sila na mga tauhan o tagasuporta ng Bagong Hukbong Bayan. Ang ilan dahil sa takot na hulihin ay napilitang pumasok bilang CAFGU.

> *Pagbabalat kayo ng militar na sila’y mga tauhan ng “Rebolusyonaryong Hukbong Bayan”.*

Layunin nito ay para mang-upat sa pagitan ng BHB at RHB. Gayundin, pain ito para tambangan ng militar ang mga Pulang Mandirigma. Ang RHB ay paramilitar at bandidong armadong grupo ng rebisyonistang pangkatin ng “Marxista Lenistang Partido ng Pilipinas”.

Sa Cauayan Mexico, Pampanga, nag-operasyon dikit (OD) ng mga islogan ng RHB ang mga tauhan ng

69th IB PA. Sa ilang baryo naman ng San Luis, Pampanga, pumasok sa baryo ang mga tauhan ng PA at nagpakilalang mga RHB.

> *Panghuhuli ng sibilyan at pag-akusa sa kanila na may mataas silang katungkulan sa Communist Party of the Philippines-New People’s Army.*

Hinuli ang tatay at kapatid ng isang kasamang hukbo nitong Oktubre sa baryo Matawe, Dingalan, Aurora. Ibinalita sa *media* na ang nahuli ng militar ay mataas na opisyal ng NPA na kinabibilangan nina Ka Joven at Ka Joshua.

Nitong Setyembre, sa Brgy Cutud, Angeles City Pampanga,

hinuli ng mga tropa ng 69th IB PA sa ilalim ni Maj. General Alberto Braganza, kumander ng 7th Infantry Division, ang isang maliit na negosyante na inakusahang nilang kalihim ng CPP-GL at namumunong kadre ng Hilagang Kanlurang Pampanga.

Inamin ng humuli sa naturang negosyante at kanyang pamilya na siya ay inosente at *fall guy*. Kailangan daw siyang hulihin para may maiharap na “malaking isda” si Maj. Gen. Rodolfo Garcia, pinuno ng Northern Luzon Command, kay Gen. Benjamin Defen-



'Friends of Jose Maria Sison', inilunsad sa GL

"Walang batayan at malisyoso ang akusasyon na 'terorista' si Jose Maria Sison gayundin ang Partido Komunista ng Pilipinas at Bagong Hukbong Bayan." Ito ang pahayag ni Roman Polintan, tagapangulo ng Bagong Alyansang Makabayan – Gitnang Luzon kaugnay ng paglulunsad ng kampanyang "Friends of Jose Maria Sison".

Inilunsad nitong Nobyembre 8 ang "Friends of Jose Maria Sison" sa Bale Heredencia, Calle Lakandula sa Angeles City. Kampanya ito para magbuo ng pampublikong kamulatan sa tunay na katayuan ni Ka Joema sa maling akusasyon sa kanya ng gubyernong US at ng Pilipinas. Layunin ding igiit ang katayuang *political refugee* ni JMS sa The Netherlands.

Nilinaw ni Ka Roman na hindi totoong ayaw bumalik ni Joema sa Pilipinas para lumahok sa usapang pangkapayapaan sa pagitan ng gubyerno at ng NDFP. Bukas si Ka Joema sa usapang pangkapayapaan. Dagdag pa niya, "Hindi babalik si Joema sa bansa hanggat hindi ginagarantiyahan ng gubyerno ang kanyang kaligtasan".

Dinaluhan ang nabanggit na pagtitipon ng 100 mga kaibigan at tagasuporta ni Joema mula sa hanay ng taong simbahan, akademisyan, negosyante, mga kawani ng gubyerno, propesyunal, manggagawa, estudyante,

maralitang tagalunsod, magsasaka, at katutubo. Kabilang sa mga tagapagsalita si Atty Romeo Capulong, isa sa mga pangunahing hukom ng International Criminal Court at abogado ng National Democratic Front.

Ibinahagi ni Atty Capulong ang maikling talambuhay ni Ka Joema na nagpakita sa kanyang pagiging tunay na makabayan at kasama sa mga pakikibaka ng mga inaaping mamamayang Pilipino gayundin ng mamamayan sa buong daigdig.

Sa naturang pagtitipon, nagkaroon din ng pagbasa sa mga tula ni Ka Joema, kulturang pagtatanghal at paghahapag sa planong kampanya at petisyon. Nasundan ito ng martsa-rali sa Plaza Miranda ng syudad.

Matatandaan na noong Agosto 9 nang taong ito, inanunsyo ni US State Sec. Colin Powell na itinuturing ng gubyernong US na isang "foreign terrorist organization" (FTO) ang PKP at BHB. Noong namang Agosto 12, idinagdag si Ka Joema sa listahan ng mga "terorista" na inilakip sa EO 13224. Ang hakbanging ito ay bahagi ng plano ng US na palalimin ang panghihimasok-militar nito sa bansa sa harap ng pagpapanibagong-lakas ng armadong rebolusyonaryong kilusan para sa tunay na pambansang kalayaan at demokrasya. *H*



sor, chief of staff ng Armed Forces of the Philippines. Ipinagyabang naman ni Garcia na may nahuli silang mataas na opisyal ng CPP-NPA upang pagtakpan ang kahihiyang inabot nila sa serye ng matatagumpay na taktikal na opensiba ng NPA sa Maco, Compostella Valley, sa Angat at San Rafael ng Bulacan, sa San Narsiso at Tiaong ng Quezon, at sa Abra de Ilog, Occidental Mindoro.

> *Paghahasik ng kasinungalingan sa media na may napatay at nasugatan silang NPA sa ilang labanan.*

Walang katotohanan na apat na mandirigma ang napatay sa engkwentro sa pagitan ng AFP at BHB nitong Okt. 10 sa Brgy Bikal, Mabalacat, Pampanga. Misimpormasyon ito upang pagtakpan ang *misencounter* sa pagitan 69th IB at Bantay Bayan sa San Jose, Magalang, Pampanga. Hindi rin totoong dalawang NPA ang napatay ng mga tauhan ng 71st IB PA sa engkwentro noong Setyembre 30 sa Brgy Bonifacio, Cuyapo, Nueva Ecija.

Kasinungalingan din ang ibinalita ng militar na may mga sugatang kasama sa labanan sa pagitan ng NPA at 75th IB sa Brgy Dimatubo, San Luis, Aurora noong Agosto 7.

> *Paghahasik ng takot sa mga mamamayang lumalaban sa bandilang proyekto ng gubyerno.*

Magkasanib na nag-operasyon ang 200 tauhan ng 48th IB PA at Provincial Mobile Group mula Oktubre 7 hanggang Nobyembre 10 sa San Manuel at San Nicolas, mga bayang nakapaligid sa San Roque Dam (SRD) at National Power Corporation (Napocor) sa Pangasinan. 160 dito ay mga bagong gradweyt na pulis na isinabak sa operasyon. Kailangan umano ang operasyong ito dahil may plano ang NPA na pasabugin ang SRD at Napocor. Na hindi naman totoo. Ang tunay na layunin ng nabanggit na operasyon ay upang takutin ang mamamayan na tumutuligsa at lumalaban sa pagtatayo ng SRD na magpapalubog sa maraming bayan ng Pangasinan. *H*

Katutubo ng Zambales, nakinabang sa Rebolusyong Agraryo

Mahigit 200 pamilyang katutubo sa dalawang baryo ng Zambales ang nakinabang sa rebolusyong agraryo (RA) kaugnay ng pagpapatataas ng presyo ng buho at kugon nitong taong ito. Naitaas ang bayad sa *cutter* o nangangalap ng buho mula P3.50/piraso mula sa dating P2.50 samantalang itinaas ang bayad sa *middleman* nang P7.50 mula sa dating P6.00. Ginawa namang P11.00 ang bayad sa *cutter* ng kugon para sa 1 metrong haba at tatlong dangkal ang standard na kapal mula sa dating P9.00-10.00; sa *middleman* naman ay naging P14.00 mula sa dating P12.00.

Naipagtagumpay ang pagtataas ng presyo ng buho at kugon bunga ng pursigidong pagkilos ng mga magsasakang kasapi ng Pambansang Katipunan ng Magbubukid (PKM), rebolusyonaryong organisasyon ng mga magsasaka. Naging susi rito ang pagkukumpleto ng panlipunang pagsisiyasat at pagsusuri sa uri sa dalawang baryo. Ito ang naging salalayan sa pagsisinop at pagbabalangkas ng plano sa RA.

Sa gabay ng mga kasama, pinangunahan ng mga kagawad ng Komiteng Pang-organisa ng PKM sa dalawang baryo ang mga pulong masa at pag-aaral ng mga myembro ng PKM upang ipalaganap ang pagsusuri sa uri at ang nilalaman ng ilulunsad na RA.

Ayon sa pagsisiyasat, isa sa pangunahing pinagkukunan ng kabuhayan ng mga katutubo sa ilang bayan ng Zambales ang pangangalap ng buho at kugon sa bundok. Tuwing tag-araw lamang ang paggapas ng kugon samantalang ang pagpuputol ng buho ay nagagawa sa buong taon. Gayunman, hindi naman mailalabas ang produkto kapag tag-ulan dahil mahirap makatawid sa lahar. Apektado ang kabuhayan at aktibidad ng mga katutubo sa panahon ng tag-ulan.



Ang *cutter* ay masang katutubo na tuwirang nangangalap ng buho at kugon mula sa bundok. Makakategorya silang mga maralitang magsasaka. Wala silang kalabaw at gareta (kariton) para magtawid ng nabanggit na produkto sa lahar. Ang *middleman* ay katutubo rin na may kalabaw at gareta na naghahakot ng kugon at buho papunta sa mga sakadora (lokal na mamimili o LM). Mga tatlong oras o mas matagal pa ang tagal ng paghahakot ng kalabaw. Mas pinipili ng mga *cutter* na sa *middleman* ibenta ang kanilang produkto dahil mahal din ang upang kalabaw at gareta. Ang *middleman* naman ay nagpapatong ng ilang piso sa nahahakot na produkto ng mga *cutter*. Karaniwang mga 300 buho ang kayang ikarga sa gareta papunta sa pwesto ng sakadora.

Mahigit 50 *cutter* ang nakipagnegosasyon sa mga apat na sakadora para maitaas ang presyo ng kanilang produkto. Tinugunan ng limang LM ang kahilingan ng mga katutubo para sa pagtataas ng presyo ng kugon at buho. Pinanghawakan maging ng isang sakadorang hindi nakadalo sa negosasyon ang mga nabuong kasunduan.

Ang sumusunod ang nabuong kasunduan sa pagitan ng *cutter* at sakadora:

1. Kagyat na sisimulan ang pagtataas ng presyo ng kalakal.
2. Kailangang tiyakin ang kalidad ng mga produkto.
 - a. Sa buho: 15 talampakan ang minimum na haba, kasinlaki ng bateryang size D ang pinakamaliit, nakatuhog na tig-10 piraso, magulang at tuyo.
 - b. Sa kugon: tatlong dangkal ang *standard* na kapal, isang metro ang minimum na haba at mahigpit ang tali pati sa loob.
3. Sa pagdeliber, aktwal na itse-tsek ng nagdedeliber at LM ang kalakal. Kung may reject, sa maksimum ay hindi bibilhin; sa minimum ay pag-usapan kung babayaran sa murang halaga.
4. Hindi ibababa ng *cutter* ang presyo sa napagkasunduan para lamang mapabilis ang pagbebenta sa panahon ng kagipitan.
5. Sa panahon na kinakapos ang LM para bayaran ng tamang halaga ang dinideliber na kalakal, babayaran ng LM sa susunod na pagdeliber.

Minimum na RA sa GL, patuloy na sumusulong

Sa pamumuno ng Partido at suporta ng Bagong Hukbong Bayan, isang bungkos na tagumpay ang nakamit ng mga organisasyong magsasaka sa Gitnang Luzon sa patuloy na pagsusulong ng minimum na programa sa rebolusyong agraryo (RA) at iba pang anyo ng anti-pyudal na pakikibaka.

Ilan sa mga tampok ang mga sumusunod:

Sa ilang baryo sa Nueva Ecija, dahil sa sama-sama at militanteng pagkilos ng mga magsasaka, napapayag nila ang mga usurero sa kanilang lugar na ibaba ang porsyento ng patubo. Sa utang na *cash*, naibaba ang tubo mula 30% tungong 15-20 % kada isang taniman. Sa utang namang isang bultong bigas, tatlong kabang palay na lamang ang ibabayad mula sa dating 3-1/2 kaban. Ang dating bayad na isang kabang palay o halaga nito sa *cash* sa nautang na *groceries* na may halagang P250 ay P300 na lang ang bababayaran.

Sa Aurora, napusisyunan ng 21 magsasaka ang 50 hektaryang tiwangwang na lupa. Sama-sama nilang tinabas at hinawan ang lupaing nabanggit. Napapasigla rin sa ibang baryo ang suyuan o bayanihan sa pagtatapas ng kaingin at pagtatanim ng saging.

Sa Zambales, naitaas ang presyo ng buho at kugon na binibili ng mga lokal na mamimili sa mga katutubo. (Tingnan ang kaugnay na artikulo.)

Sa Pampanga, inilunsad ang rehabilitasyon ng lupa na isinabay sa pagkilos laban sa quarry. Ipinagbawal ng mga taumbaryo na kumuha ng buhangin sa ilog para makadaloy ang tubig tungong irigasyon. May pinalayas na nagku-quarry dahil sa hindi pagtupad sa patakaran. *H*

6. Kung *groceries* ang ibabayad ng LM sa nagdeliber, ang katumbas na presyo nito sa palengke ang magiging batayan.
7. Sa mga utang ng cutter, hindi buong kakaltasin ng LM sa cutter ang utang. Unti-unti itong kakaltasin ng LM kada deliber.
8. Sa pagbabayad ng utang, dapat na ibigay muna ng LM ang bayad sa kalakal sa nagdeliber bago ibigay mismo ng nagdeliber ang bayad sa utang. Ibabatay pa rin ito sa napagkasunduang sistema ng pagbabayad.
9. Hindi magbabagsak ng kalakal ang cutter sa ibang LM hangga't may utang pa siya sa ibang LM. Kung wala nang utang ang cutter sa LM, malaya itong magbenta sa nais nitong LM. *H*

Kampanya laban sa importasyon ng bigas, lumalawak

Umaani ng mainit na pagsuporta ng mamamayan ang kampanya ng mga magsasaka sa Gitnang Luzon (GL) sa panawagang itigil ang importasyon ng bigas, itaas ang presyo ng palay sa P15/kilo, at panawagan sa makatagurungang presyo ng bigas. Ang kampanyang ito sa rehiyon ay pinangunahan ng Alyansa ng mga Magbubukid sa Gitnang Luzon at ng Kilusan ng mga Magbubukid sa Pilipinas sa pambansang saklaw.

Sa GL, tinampukan ang nabanggit na kampanya sa pagpapapirma ng petisyon para sa pagpapataas ng presyo ng palay, paglulunsad ng mga porum, *press conference*, *mobile-prop-teams*, martsa-rali, at pagbubuo ng alyansa.

Sa panahon ng kampanya, nabuo ang Rice Coalition in Central Luzon o RICE na dinaluhan ng mga 200 katao, gayundin ang Alyansa sa Pagpapataas ng Presyo ng Palay at iba pa o ALPAS. Nakuha rin ang suporta ng mga kooperatiba, pederasyon at *irrigator's association* sa Nueva Ecija at Pangasinan. Sa Pangasinan, 70 pederasyon at kooperatiba ang nagpahayag ng suporta sa naturang kampanya. Ang simbahan ay sumusuporta din sa panawagan sa pagtataas ng presyo ng palay.

Dahil sa masigla at lumalawak na pagkilos ng mga magsasaka sa rehiyon para sa nabanggit na kampanya, napapayag ang ilang *trader* na itaas ang presyo ng palay hanggang P10 bagamat malayo pa ito sa panawagang P15/kilo. Nakuha rin ang suporta ng ilang Sangguniang Bayan at mga Konseho ng Baryo. Sa Bulacan, nangako ang ilang Konseho ng Barangay na hindi papasukin sa baryo ang mga namimili ng palay na mas mababa sa P10/kilo.

Nagpahayag din ng suporta ang mga empleyado ng NFA-Bulacan at Nueva Ecija gayundin ilang Kongresista sa pangunguna ng Bayan Muna. Dumalo naman sa hearing sa Kongreso ang may 1,000 empleyado ng NFA mula sa iba't ibang probinsya ng GL para ipakita ang kanilang pagsuporta sa kampanya ng mga magsasaka.

Sa kabilang banda, kinausap naman ng militar sa Nueva Ecija ang mga usurero na huwag magpapautang at mamimili ng palay sa mas mataas na presyo. Pagpapatunay na ang reaksiyunaryong militar ay hindi nagsisilbi sa interes ng mga magsasaka at iba pang anakpawis. *H*

Hakbang Pasulong sa Rebolusyon*

Isang paa lamang ang nawala sa akin, hindi ang determinasyong patuloy na makibaka!

Ang pagputol ng mga militar sa aking paa ay lalong nagpatatag sa aking paninindigang magrebolusyon. Ito ay markang patuloy na nagpapaalala sa akin sa kalupitan ng mga berdugong militar, sa kanilang asal-hayup na pagtrato sa tulad kong bihag sa labanan, at sa paglapastangan sa bangkay ng isang kasamang nag-alay ng buhay sa rebolusyon...

Sa panahong gumagampan ako ng rebolusyonaryong gawain – pagmumulat, pag-oorganisa at pagpapakilos ng masa – sa isang larangang gerilya, ang pinamumunuan kong yunit (SYP) ng Bagong Hukbong Bayan (BHB) ay nai-tip ng isang taong bayaran ng mga pasistang kaaway. Ipinagkanulo kami ng taong pinagtiwalaan at tinrato namin nang mahusay na naging dahilan ng isang labanang ikinasawi ng dalawang kasama at malubhang ikinasugat ng paa ko at ng isa pang kasama.

Di ko malilimutan kung papaano kaming pinaulanan ng putok ng kaaway nang walang pagsasaalang-alang kung may madamay mang sibilyan/masa sa lugar, habang pilit naming inilalayo ang labanan sa mataong lugar. Matapos ang engkwentro, pinasok ng militar ang mga bahay ng masa at pinagsasamsam ang

bigas, kaldero at lahat ng ari-ariang maaari nilang pakinabangan.

Kasuklam-suklam ang kalapastanganang sinapit ng bangkay ng kasama sa kamay ng mga militar. Sabog ang ulo at luwa ang bituka ng dalawang nasawing kasama. Ngunit sa halip na linisin at ayusin, sila'y kinaladkad at pabalibag na isinakay sa sasakyan na parang tinibang saging. Pagkatapos ay ibinilad at inilagak sa isang lugar. Nang walang kaanak na tumunton makalipas ang ilang araw, sila'y parang hayup na ibinaon na di man lang inilagay sa ataul.

Kami ng isa pang kasama na nahuli nilang buhay ay dumanas ng mga pahirap kahit kami'y kapwa sugatan at wala nang kakayahang lumaban. Pahagis din kaming isinakay sa sasakyan ng militar katabi ng bangkay ng kasama at habang nasa byahe ay pinagmumumura pa kami at tinatapakan ng kaaway sa ulo at katawan.

Pagsapit namin sa klinika ng munisipyo ay idinispley kami nang duguan at halos walang saplot sa katawan sa harap ng maraming tao. Ginamit kami sa black propaganda ng militar at ipinanawagang huwag tularan ng kabataan, kundi'y sasapitin din ang tulad ng sinapit namin.

Pagkagaling sa nasabing klinika, muli kaming ibinyahe patungo sa isang ospital upang doo'y iwanan lamang nang di pa rin nililinisang sugat at walang suot kundi brief na basa ng dugo. Tatlong araw kami sa ospital na iyon ngunit wala isa mang duktor ang tumingin sa aming kalagayan. Nang may dumating na akong kamag-anak ay saka lamang nila kami nilinisang katawan, subalit hindi ang aming sugat. Tila hinihintay na lang nilang mamatay kami sa pagkaubos ng dugo kundi man sa impeksyon. Kundi ko pa pinag-



ayos ng sasakyan ang isang kamag-anak, hindi pa kami sasamahan ng mga militar na makalipat sa isang Provincial Hospital.

Subalit pagdating namin sa Provincial Hospital ay muli kaming pinagpiyestahan ng mga militar. Doon ay ipinakuha kami ng isang opisyal-militar at ipinadala sa Fort Magsaysay. Sa tagal na hindi nalinis at nalapatan kahit ng pangunang lunas ang aming sugat, halos bulok na ang sugat ko at laganap na ang impeksyon.

Muli kaming ibinyahe patungo sa isang ospital ng militar sa Fort Bonifacio upang duon danasin ang isang napakasaklap na bahagi ng buhay ko – ang maputulan ng isang paa. Pinutol nila ng hanggang hita ang isa kong paa! Pinutol na rin nila ang aking kakayanan at pag-asang makabalik pa sa yunit kombatant ng BHB!

Dalawang linggo rin kaming hawak ng kaaway bago kami natunton at naigiit na ilabas ng mga taong tunay na nagtataguyod ng karapatang-tao. Sa loob ng dalawang linggo, ginamit ng kaaway ang iba't ibang paraan upang kami'y kumbinsihing bumaligtad at ipagkanulo ang mga kasama at ang masa. Matapos kaming pahirapan, sinubok nila kaming silawin sa maraming magagandang pangako. Ngunit kahit bayaran pa nila ako ng malaking halaga, hindi ko kayang ipagkanulo ang mga kasama at ang masa. Mas nanaisin ko pang mapiit sa isang mainit, makipot at madilim na bilangguan kaysa ipagkanulo ang aking mga kasama. Patayin man nila ako, wala silang makukuhang impormasyon sa akin!

Pagkalaya namin mula sa kamay ng kaaway, habang nagpapagaling ako ng sugat sa aking naputol na paa ay dumating ako sa punto na tinatanong ko ang aking sarili kung kakayanin ko pa bang gumampan ng gawain



para sa rebolusyon? Nasanay akong nakakikilos nang normal sa paggampan ko ng gawain bilang Pulang mandirigma, at humahawak ng responsibilidad sa loob ng yunit na aking kinatalagahan.

Naaawa man ako sa aking sarili, sinikap kong igpawan ang lahat ng mga agam-agam dahil alam ko na ito at maging ang kamatayan ay bahagi ng sakripisyong aking sinumpaang. Sa gitna ng mahaba-habang panahong walang kumakausap sa aking kasama mula sa Larangang Gerilya, iniisip ko na lamang ang sakripisyo ng maraming

martir na nag-alay na ng buhay para sa sambayanan, at ang pangangailangang palayain ang masa mula sa pagsasamantala ng naghaharing uri. Sa gayon, hindi nawaglit sa aking diwa ang rebolusyon at ang mamamayan!

Kaya nang naitalaga ako sa bago kong gawain ngayon, tinanggap ko ito nang buo ang determinasyong magpakahusay at magpaunlad. Anuman ang katangian ng bago kong gawain, batid kong maaangkupan at matututunan ko ito dahil tanggap ko na sa aking sarili na hindi hadlang ang kapansanan ko sa aking determinasyong makapag-ambag sa rebolusyon at maglingkod sa sambayanan.


Nawalan man ako ng isang paa dahil sa kagagawan ng kaaway, buo pa rin sa aking isip ang kapasyahang lumahok sa pagbabago ng lipunan. Patuloy pa rin akong hahakbang pasulong sa landas ng rebolusyon!

H

=====

* Ang artikulong ito ay batay sa salaysay ni Ka Bayani, dating Iskwad Lider ng isang yunit ng BHB sa isang probinsya ng Gitnang Luzon. Nahuli siya at pinutulan ng kaaway ng paa matapos ang isang engkwentro.

Ika-34 anibersaryo ng Partido, masiglang ipinagdiwang sa GL



MABUHAY ang Partido Komunista ng Pilipinas!
Mabuhay ang Bagong Hukbong Bayang!
Mabuhay ang sambayanang Pilipino!

Ito ang sama-samang isinigaw ng mga dumalo sa selebrasyon ng ika-34 taong anibersaryo sa muling pagkakatatag ng Partido Komunista ng Pilipinas na idinaos sa ibat ibang bahagi ng Gitnang Luzon. Dinaluhan ang mga pagtitipon ng mga kasapi ng Partido, ng Bagong Hukbong Byan at ng rebolusyonaryong masa.

Sa rehiyon, may pagdiriwang sa anibersaryo ng Partido na konsentrado at malakihan, at meron ding desentralisado at maliitan. May selebrasyon sa aktwal na petsa ng anibersaryo at mayroon ding nagtipon makalipas ang Disyembre 26 dahil sa konsiderasyong panseguridad. Ang pinakamalaking bilang ng nagtipon ay lampas sa 200 samantalang ang pinakamaliit naman ay kulang sampu. Bukod sa selebrasyon sa kanayunan, may mga nakapagtipon din sa kalunsuran.

Ang ating Partido ay napanday na sa 34 na taon ng mahirap na rebolusyonaryong pakikibaka. Di hamak na mas malaki tayo ngayon kaysa noong 1968 nang muling katatayo pa lamang at noong 1992 nang kagagaling sa dekadang paglihis. Hawakan natin ang mga tagumpay at pangibabawan ang mga pagkakamali at kahinaan.

Sa mga pagtitipon, inawit ang Internasyunal, ang pandaigdigang awit ng proletaryado, sa pagbubukas at pagsasara ng programa. Tinalakay ang pangkalahatang pagsulong ng rebolusyonaryong kilusan sa Gitnang Luzon sa taong 2002, nagpugay sa mga rebolusyonaryong martir, at tinukoy ang pangkalahatang mga tungkulin para sa susunod na taon. Nagsibati sa anibersaryo ang mga dumalo. At

may mga kulturang pagtatanghal na kinabilangan ng pag-awit, pagtula, pag-arte at pagsayaw. Sa pagtitipon sa Pam-panga, inawit din ang bersyong Kapampangan ng Internasyunal.

Bukod sa nabanggit, ang ibang pang naging anyo ng paggunita sa dakilang araw ng Partido ay pulong ng sangay ng Partido sa lokalidad, pulong-pag-aaral at pagpapasumpa ng mga bagong kasapi ng PKP.

Matatandaan na muling itinatag ang Partido noong Disyembre 26, 1968 sa teoretikong gabay ng Marxismo-Leninismo-Maoismo para pamunuan ang bagong demokratikong rebolusyon para sa pambansang pagpapalaya mula sa imperyalismong US at sa panlipunang paglaya mula sa pyudalismo. Ito'y matapos ipagkanulo ng pamunuang Lava at Taruc ang lumang partidong pinagsanib. Sa kasalukuyan, malalim at malawak nang nakalatag ang rebolusyonaryong kilusan sa buong bansa — mayroon nang 128 larangang gerilya na kinikilusan ng BHB na nakakalat sa may 800 bayan at 70 probinsya.

“Ang ating Partido ay napanday na sa 34 na taon ng mahirap na rebolusyonaryong pakikibaka. Di hamak na mas malaki tayo ngayon kaysa noong 1968 nang muling katatayo pa lamang at noong 1992 nang kagagaling sa dekadang paglihis. Hawakan natin ang mga tagumpay at pangibabawan ang mga pagkakamali at kahinaan. Matagalan ang digmang bayan pero nasa atin kung paanong ang kasalukuyang abanteng subyugto ng estratehikong depensiba ay maitataas na natin sa bago at mas mataas na yugto. Pangibabawan natin ang konserbatismo at kabagalan. Mangahas tayong sumulong nang mas mabilis, mas matatag at mas komprehensibo sa gitna ng matinding krisis ng pandaigdigang sistemang kapitalista at ng sistemang malapyudal at malakolonyal sa Pilipinas.” Ito ang bahagi ng naging panawagan ng Komiteng Rehiyon ng Gitnang Luzon sa anibersaryong pahayag nito. H